

東

華

錄

臣王先謙敬編

臣周倫蕃恭校

康熙二十七年戊辰春正月乙亥朔諸王大臣等以元旦令節奏請 皇上節哀回宮不允羣臣復敦請再四 上於是暫住 慈

甯宮前院幕次○丙子國子監奏太學生劉枝桂等五百餘人呈請 皇上節哀循古服制以日易月章下內閣○戊寅 上居

大行太皇太后喪次哀慟不止如前內閣以諸王大臣及士民等奏請以日易月之奏一併進呈公同奏曰 皇上欲行三年之喪

臣等再四思之實有難行之處請仍遵歷代定制 上曰朕凡事一本於誠行三年之喪朕意甚切非飾虛名仍宜遵照前旨行諸

王大臣等復再三懇請 上曰三年之喪朕意以爲可行故有前

諭諸王大臣及百司士庶皆爲阻止履行陳奏此際朕心甚煩俟再思之○己卯王以下文武各官復奏請以日易月諭曰昨裕王恭王亦勸朕從王大臣士民之請朕不得已勉如所請○辛巳諭禮部 大行太皇太后聖德母儀昭示萬國昔奉我 皇祖太宗文皇帝贊襄內政誕育我 皇考世祖章皇帝願復劬勞受無疆休大一統業資朕踐阼方在冲齡仰荷我 聖祖母訓誨殷勤以至成立晨昏依戀三十餘年方期游享遐齡茂膺繁祉詎意適遭違豫奄忽上賓朕哀疚之深五中摧絕昊天罔極報德實難緬維厚澤深仁信足炳傳簡冊非薦隆號莫展哀誠宜恪遵彝憲恭上尊諡垂示無窮以慰朕尊親之意著內閣翰林院詹事府會同擬奏其應行典禮爾部詳議以聞於是內閣等衙門卽恭擬 尊諡二道進呈奉旨應上 太皇太后尊諡曰孝莊仁宣誠憲恭懿

朔天啟聖文皇后諭 太皇太后升遐未久祭文內遽改稱 尊  
諡朕心深爲不忍應俟 梓宮奉安昌瑞山後始稱 尊諡以祭  
○癸未 皇子允禔生○乙酉奉移 大行太皇太后梓宮安設  
於朝陽門外殯宮發引時 上手攀 梓宮稽顙痛哭迨 梓宮  
啟行後 上於 梓宮前步行沿途哭不停聲 梓宮更舁校時  
必跪於道左哀慟不已至 梓宮奉安之後號泣良久致奠行禮  
諸王大臣等奏曰 梓宮已經奉安請 皇上還宮 上曰朕於  
太皇太后無由復侍此乃慎終之時憔悴困憊皆所不恤此刻  
殊覺委頓胸臆煩熱欲於此尋一小室暫居之視體中如何尙未  
知明日能還宮否爾諸臣愛朕誠惻朕知之矣○丁亥行初次致  
祭禮○戊子行釋祭禮諸王大臣固請 皇上還宮 上曰朕連  
日居一小室意欲久駐於此爾等旣再三奏請今仍暫回朕自幼

讀書稍知孝道豈忍遽圖便安茲雖暫回亦不入宮內姑設幕席地而處少遲一二日當復來此是日 上遂幕居乾清門外之左諸王大臣及外藩王台吉等請 上還宮不允九卿詹事科道等亦具奏請還宮調攝諭朕遭 太皇太后崩逝欲持服二十七月立志甚堅諸王大臣及百官士民再三陳奏情詞懇切不得已勉從所請中心歉仄因幕居乾清門外以盡哀誠今仍又請還宮不過以朕躬爲念朕身爲天子豈不自愛但人孰無祖父母父母爲子孫皆當盡孝何分貴賤朕孝治天下思以表率臣民若致異日稍畱遺憾恐非諸臣愛君之意諸王大臣激切奏懇已有諭旨不允卿等其仰體朕心勿復言○先是諸王大臣及士民等奏請以日易月之奏俱未批答至是得旨朕以薄祐幼失 怙恃幸依 聖祖母膝下如見 皇考妣音容今遭遐棄痛念 慈恩悲哀並

集欲持服二十七月仰答 聖祖母鞠育深仁兼報 皇考妣劬

勞大德諸王大臣及各官等援引歷代成例堅請再三並謂 郊

廟祀典不宜久輟升祔大禮及時舉行且士民伏闕披瀝眾情謂

國恤淹久有妨民業朕反復思維不得已以禮抑情勉從所請該

部知道○甲午諸王大臣等奏明日行大祭禮釋服乞 皇上照

定例還宮乾清門外所設幕請今日拆收之不允諸王大臣固請

上曰爾等奏請懇摯朕於二十二日釋祭畢還宮是日亦欲遣

外藩王等歸國乾清門外所設之幕至期拆收○乙未 上詣

大行太皇太后梓宮前行大祭禮釋服傳諭內大臣曰科爾沁王

貝勒貝子公台吉等馳至守服應加賞賚命出 太皇太后宮內

白金綵段分賜之其先因出痘令回部落者亦令一體霑恩諭曰

爾等皆 太皇太后姻戚齊至喪次克終其事殊爲可憫因以

太皇太后所遺之物頒賜爾等眾皆感泣又諭爾等不必向朕謝恩可令詣 太皇太后梓宮前謝恩行禮是日 上仍居殯宮之側○丙申 上釋祭 大行太皇太后舉哀行禮畢回宮居乾清宮門內偏殿諭裕親王自 太皇太后違豫以來與朕同處殊爲勞苦可著 皇長子及領侍衛內大臣等送王歸第○丁酉 上御乾清門衣青色布衣聽政江南道御史郭琇奏參靳輔治河無功聽幕賓陳瓚阻撓下河開濬宜加懲處又戶部尙書王日藻等議靳輔奏請屯田一事有累於民請行停止至高家堰之外再築一隄應如靳輔所請 上曰河道必親歷其地然後可議其事爾九卿等俱未親歷徒然懸揣安有定論隨令郭琇跪近 御前顧九卿等曰朕南巡時往勘河道高家堰南北及清口以南高郵等處朕俱沿隄步行親加詳覽河上情形頗深悉之今欲築重隄使

水由清口入海若果有裨益則當日何以不早築耶高郵等七州縣百姓苦累異常此朕目擊而傷心者今於隄外又築一隄是重困小民矣至於屯田有利於廷臣而害民實甚陳瓚本一介小人通國盡知屯田之說江南人莫不嗟怨爾等甯不聞耶兵部梁清標奏曰屯田實有害於百姓斷不宜行 上以郭琇參本令九卿

一併會同察議具奏○禮部奏本年二月初九日屆會試場期茲遇 大行太皇太后賓天典禮繁重應展期一月於三月初九日舉行會試 上曰會試士子貧寒者多展期一月不無苦累著展期十日○江西巡撫王隲廣東巡撫朱宏祚陞辭諭巡撫爲地方大吏以操守爲要大法則小廉百姓俱蒙福矣王隲奏曰臣向在四川時不取民間粒米束草惟帶一一家僮往家中取盤費不敢有私 上曰身爲大臣尋常日用豈能一無所費若必分毫取給



於家勢亦有所不能但操守廉潔念念從愛百姓起見便是良吏督撫中如兩于成龍及范承勳誠良吏也爲督撫者在朕前皆能言之及至地方與所言往往不符人貴始終如一朕特簡爾等當砥礪清操毋負朕擢用之意朕事事以百姓爲念爾等到地方一切利害有關百姓者不妨事事奏聞王鵬奏曰臣等嚴禁屬吏科派及詞訟賄賂諸弊上曰爲大吏者亦須安靜安靜則爲地方之福凡貪汙屬吏先當訓誡之若始終不悛再行參劾可也大學士等奏曰臣等瞻仰天表迥異往時伏祈珍攝上曰九卿所奏河工關繫重大兩巡撫陛辭赴任亦屬緊要朕所以力疾御門爾等所奏朕自知之是日上回乾清門內偏殿諸王大臣等以喪事旣畢請皇上移駐瀛臺稍遣聖懷上曰凡事皆有不

易之理朕因定例不得已釋服今於宮中朕自盡孝亦理所當然

並非好異沽名爾等勿復奏○戊戌諭大學士等自 太皇太后  
違豫 皇太后盡孝侍奉甚爲勞悴 太皇太后賓天復哀痛太  
過 慈顏清減昨者朕詣 皇太后宮問安見癯瘦更甚積勞成  
疾服藥調理 皇太后關繫甚大朕心深爲憂慮明日 太皇太  
后一月之祭爾等可奏請不必前往於是大學士等詣 皇太后  
宮門遵旨奏請 皇太后諭曰予之服藥專爲明日祭也今亦稍  
安明日決意前往大臣等復行奏請 皇太后終不允○己亥

上詣 大行太皇太后梓宮前行一月致祭禮○癸卯以阿喇彌

爲內閣學士

由內閣侍讀學士遷

○河南巡撫章欽文以庸劣革職

二月戊申漕運總督慕天顏奏前臣等會勘河工河臣靳輔議築  
高家堰重隄臣等議修高家堰舊隄後尙書佛倫等奉命再行會  
勘皆從靳輔臆說臣不敢附會且河臣倡舉屯田一事屯官丈占

民田百姓苦累臣據實奏聞得旨本內事情著九卿詹事科道察

議具奏○己酉以柯永昇爲湖北巡撫

由安徽布政使遷

○琉球國中山

王尙貞遣使入貢請以子弟梁成楫等三人入監讀書允之○王

子先是御史郭琇奏參大學士明珠等疏題爲特參大臣背公結

黨納賄營私仰請

乾斷立賜嚴譴以清政本事臣聞自古帝王

御天下之道舉直錯枉而已堯舜之世未嘗不有共鯀驩兜堯舜

始焉因其才而姑用之繼焉知其奸而誅殛之故堯舜之世稱爲

極盛我

皇上至德純粹睿鑒淵深與放勳重華異世同揆臣竊

見 皇上用人行政孜孜求治惟恐一夫不被澤一物不得所私

竊歎誦千古難邁邇者畿輔之地奸邪逞詐植黨類以樹私竊威

福以惑眾日益縱肆

皇上灼知情僞於一切用人皆由宸聰獨

斷中外翕服無不踊躍思奮臣蒙

皇上破格超擢感激涕流莫

知所以爲報竊自念職在糾彈仰體堯舜之心輒效鷹鷂之逐謹將大學士明珠余國柱背公營私實迹臚列具呈一凡閣中票擬俱爲明珠指麾輕重任意余國柱承其風旨卽有舛錯同官莫敢駁正 皇上聖明時有詰責乃漫無省改卽如御史陳紫芝奏劾湖廣巡撫張汧奏內並請議處保舉之員 皇上面諭九卿應一體議處乃票擬竟不之及則保舉之張汧原屬指麾卽此可見矣一明珠凡奉諭旨或稱其賢則向彼云由我力薦或稱其不善則向彼云 上意不喜吾當從容挽救且任意增添以市恩立威因而要結羣心挾取貨賄至於每日啟奏畢出中左門滿漢部院諸臣及其腹心拱立以待皆密語移時 上意無不宣露部院衙門稍有鬪繫之事必請命而行一明珠結連黨羽滿洲尙書則佛倫葛思泰及其族姪侍郎傅臘塔席珠等漢人之總攬者則余國柱

結爲死黨寄以腹心向時凡會議會推皆佛倫葛思泰等把持而國柱更爲之囊橐惟命是聽但知戴德私門一凡督撫藩臬缺出余國柱等無不展轉販鬻必索及滿欲而後止是以督撫等官愈事剝削小民重困今天下遭遇 聖主愛民如子而民間猶有未給足者皆債官搜索以奉私門之所致也一康熙二十三年學道報滿之後應升學道之人率往論價九卿選擇時公然承風任意派缺缺皆豫定由是學道皆多端取賄士風文教因之大壞一靳輔與明珠余國柱交相固結每年糜費河銀大半分肥所題用河官多出指授是以極力庇護 皇上試察靳輔受任以來請過錢糧幾何通盤一算則其弊可知矣當下河初議開時彼以爲必委任靳輔靳輔欣然欲行九卿亦無異辭及 皇上欲另委人則以于成龍方沐 聖眷舉出必當 上旨而成龍官止臬司可以統

攝於是議題奏仍屬靳輔此時未有阻撓意也及靳輔張大其事與成龍議不合於是始一力阻撓皆由倚託大臣故敢如此 天

鑒甚明當洞悉靳輔累抗拒明詔非無恃而然也一科道官內升有出差者明珠余國柱率皆居功要素至於考選科道卽與之訂約凡有本章必須先行請問由是言官多受其牽制一明珠自知罪戾見人輒用柔顏甘語百般款曲而陰行鷲害意毒謀險最忌者言官恐發其奸狀當佛倫爲總憲時見御史李時謙累奏稱旨御史吳震方頗有參劾卽令借事排陷聞者駭然以上各款但約略參之明珠一人其智足以窺探 上旨其術足以彌縫罪惡又有余國柱奸謀附和負恩之罪書之罄竹難盡 皇上鼓舞臣僚實其實心報效臣受非常殊眷若捨豺狼而問狐狸卽爲孤負 聖恩臣罪滋大臣固知其黨羽實繁睚眦必報恃有 聖主當

陽何所畏忌伏祈 聖威立加嚴譴簡用賢能俾贊密勿天下人情莫不欣暢感戴 聖明無盡仰祈 皇上睿鑒施行至是 上諭大學士等曰國家建官分職經理庶政必須矢志精白大法小廉各守職業實心任事庶無負拔擢簡用之意朕親理萬幾歷有年所於爾部院大小官員行事無不深知爲臣子者既僭爵受祿榮及父母庇其子孫家能自給便當自足無致隕越前已屢頒諭旨嚴行申誡又復諄諄面諭訓誨再三今在廷諸臣自大學士以下有職掌官員以上全不恪勤乃職惟知早出衙署偷安自便三五成羣互相交結同年門生相爲援引傾陷商謀私事徇庇同黨圖取貨賂作弊營私種種情狀確知已久九卿詹事科道皆朕委任之員凡遇會議自當各出己見公同商酌及一二欲行倡率之人持議於前眾遂附和於後雷同草率一意詭隨又其甚者雖在

會議之班茫無知識隨眾置題希圖完結廷議如此國勢何憑又有當集議時緘默自容及至債事巧於推卸朕深惡此等推諉苟容之輩亦屢加嚴飭至於用人關係重大羣臣賢否難以周知故遇緊要員缺特令會同推舉原期爲國得人實有裨益亦欲令被舉者做心易慮恐致溺職累及舉者因而勉自刻勵九卿諸臣宜體朕心從公選舉方爲不負委任乃歷來所舉官員稱職者固有而貪黷匪類往往敗露此皆瞻徇情面植黨納賄所致凡茲情弊朕非不知前者班布爾善阿思哈等身爲大臣所行悖亂致干憲典遂行正法至今猶耿於懷是以比來大小官員背公徇私交通貨賄朕雖洞見而不卽指發冀其自知罪戾痛加省改庶可終始保全詎意積習深錮漫無悔悟如審擬蔡毓榮一案庇護挽救贈徇黨類百計營求因朕具悉其奸私謀未遂近差色楞額往齊張



汧所參事情朕面諭色楞額張汧居官貪穢爾宜嚴行審出迨差  
回時詢問色楞額奏稱臣於此案盡心研鞫若有失實甘受誅戮  
及覽其奏案惟恐累及保舉張汧之人竟爲庇護朕知內閣原擬  
票籤將保舉張汧官員並未議及業行折出又念張汧審結定罪  
之後自然發覺因仍用原籤票發又靳輔下河工程屯田之案朕  
早已察其情弊特遣佛倫等前往勘議今所議殊屬偏私且凡會  
議之時科爾坤佛倫等務執己見持論好勝苟非懷挾私情何以  
力排眾議朕亦曾面加誠諭未見畏悔如此情弊愈久愈深物議  
沸騰輿情憤激以致言官列款參奏本應發明其事以肅官方因  
不忍遽行加罪大臣且用兵之時有曾效勞績者故免其發覺勒  
德洪明珠著革去大學士交與領侍衛內大臣酌用李之芳著休  
致回籍余國柱著革職科爾坤著以原品解任佛倫熊一瀟等著

解任於河工案內完結嗣後大小臣工各宜洗滌肺腸痛改陋習  
潔己奉公勉盡職掌以副朕寬大矜全咸與維新之至意○諭宗  
人府自古帝王展親睦族列爵錫封原欲選賢建能旌別淑慝俾  
咸知勸勉慶流奕世此國家之常經獎勵之至意也朕篤念親親  
恩禮罔替年至十五卽行受封但誼屬本支必皆飭躬砥行端良  
醇謹益自刻勵動不踰則始無忝於宗潢今親王以下奉恩將軍  
以上年至十五不問賢否概予封爵以致視爲典故罔知激勸嗣  
後親王以下奉恩將軍以上子孫應俟其年至何歲作何辨其賢  
否定其品級等第始應授封著議政王貝勒大臣及親王以下奉  
恩將軍以上會同確議具奏○黃元驥以不職革任以衛旣齊爲  
山東布政使由原任檢討遷○以文達爲理藩院右侍郎由副都統遷○癸丑  
諭大學士等朕躬不逮往時自 太皇太后聖體違和以來深覺

迷憤極切憂勞頃所言者旋卽遺忘昨一二要事折票籤付與筆帖式後竟遺忘反復思之不復記憶爲何事展轉不甯至中夜忽復憶得乃大驚惕謂已批發矣急呼筆帖式問之奏云已折票籤尙未批發於是心始稍舒或念所及數欲降旨令召其人至而所念及之事所思之言乃皆遺忘無如之何此所書敕諭乃朕所自爲而昨所更易者今日視之似有遺漏爰加增益更訂雖復更訂仍覺未盡其意似有遺漏者以此之故因念凡諸奏事朕見所未到者亦未可知凡部院事皆於國家關係重要所奏聞之事大臣庶官益當敬慎大學士學士亦宜詳加看閱爾等將此旨宣示九卿此所書不必別膾有所更易卽於此增入奏聞○戶部議覆四川巡撫姚締虞奏蜀省每歲解京白蠟道路遼遠無腳價開銷之項請嗣後停止解送令部臣就近採買又歷年抽稅生鐵積有一

萬一千六百斤有奇亦難於起運請變價充餉查鐵斤沈重解送

維艱准其變價至白蠟乃蜀產土物應令依例解送得旨白蠟仍

前解送恐致累民著一併免解○御史陸祖修奏河工屯田二事

奉有九卿會議之旨臣見總河靳輔身雖外任與九卿呼吸甚靈

會議之時吏部尚書科爾坤戶部尚書佛倫工部尚書傅拉塔左

都御史葛思泰等不顧公議左袒河臣竊思河屯利害惟直撫于

成龍首倡其說或暫停九卿之議俟于成龍等到京一一面奏明

確加之乾斷則國是定而邪謀破矣得旨河工屯田著暫停會議

俟董訥于成龍來京日將本內事情一併嚴察會議具奏○甲寅

以梁清標爲保和殿大學士

由兵部尚書遷

伊桑阿爲文華殿大學士

由禮部

部尚書遷○調廖旦爲吏部尚書

由刑部調

以李天馥爲工部尚書

由吏部左侍郎

○調丁思孔爲河南巡撫

由偏沅調

○丙辰調鄂爾多爲戶部尚書

阿蘭泰爲兵部尙書

由工部調

○丁巳以麻爾圖爲禮部尙書

由戶部左侍郎

遷圖納爲刑部尙書

由四川陝西總督遷

○轉張鵬爲吏部左侍郎以翁叔

元爲吏部右侍郎

由內閣學士遷

○己未刑部議覆翰林院奏參侍讀學

士德格勒私抹記注大干法紀侍講徐元夢與德格勒互相標榜

情罪可惡應將德格勒擬斬立決徐元夢擬絞監候得旨德格勒

著監候秋後處決徐元夢著免死枷號三月鞭一百入辛者庫○

庚申以蘇赫爲工部尙書

由倉場侍郎遷

○停止九卿詹事科道會推各

省學道員缺○以鄭端爲安徽布政使

由湖廣按察使遷

○辛酉宗人府

奏貝子星尼結交匪類行止乖張鎮國將軍白壽亦結交匪類有

玷宗室應革爵鎮國公吞珠爲人庸懦應革公爵降鎮國將軍閒

散宗室勒爾錦係軍前獲罪監禁之人蒙恩寬釋理應謹慎守分

反結交匪類博戲鬪雞甚屬不合應交伊兄弟家中拘禁看守從

之○轉寶弼漢爲戶部左侍郎以開音布爲戶部右侍郎

由左副都御史

遷○壬戌調張玉書爲兵部尙書

由刑部調

○癸亥諭大學士等近見

科道參奏甚多果有大貪大惡何不早爲參奏有等人聲言糾參

妄行嚇詐希圖利己以致各官不能自安此等嚇詐之人許卽首

告著吏部都察院通行曉諭○以洪尼喀爲倉場侍郎

由副都統遷

王

封滌爲內閣學士

由少詹事遷

○甲子宗人府議覆親王以下奉恩將

軍以上子年十五概予封爵恐致視爲故典罔知激勸嗣後應停

止此例俟年至二十辨有文藝騎射之優者列名引見請旨授封

惟親王以下奉恩將軍以上有薨逝者卽准一子襲爵不俟歲滿

得旨依議如人材超卓者不拘年歲特予封授○以葛思泰爲四

川陝西總督

由左都御史遷

興永朝爲偏沅巡撫

由四川按察使遷

○乙丑以程

憲爲湖南按察使

由廣東雷瓊道遷

○丁卯命纂修

玉牒○宗人府議

覆給事中高層雲奏參大學士王熙等以議持服事向康親王傑書跪語王等坐受俱屬不合請下部議 上曰朕召大臣議事如時久每賜墊坐語大臣與諸王會議卽行跪語不合嗣後凡會議公事不必向諸王行跪傑書王熙等從寬免議○吏部奏通政使司右通政員缺請以太常寺少卿李紹聞擬補 上命問九卿又諭大學士等今用一人外人卽曰某大臣薦舉故用之或有商議之事卽聲言某大臣稱某官之優言某官之劣致躁進之徒營求奔競從此而起凡官之優劣若不問何由而知大臣雖有薦舉用舍旨出於朕閒用一二人亦朕所知而用者若但因大臣薦舉而用之朕所理者又何事耶雖有問九卿舉出之人亦得者半而不得者半皆倖遇耳原任尙書佛倫曾薦學士趙山原任大學士明珠曾薦學士齊穡及學士舜拜阿喇彌朕皆知而用之且屢次擢

用並非聽人之言朕會以噶爾圖問詹事尹泰尹泰啟奏後卽肆

言於外伊曾將噶爾圖薦舉爾等豈不聞乎至侍讀學士德格勒

曾向朕奏云有人問臣卽云宮內門戶亦復不知後來卽將某

某優劣混行啟奏尹泰但粗識幾字凡事不堪任用誠微賤小人

也又巡撫張汧亦係九卿薦舉之人今張汧所行貪穢發覺其保

舉之人亦應議處原任侍郎塞楞額差審張汧徇私失實著將塞

楞額看守議罪○以噶爾圖爲左副都御史由通政使遷○戊辰原任

大學士杜立德馮溥以赴謁大行太皇太后梓宮畢辭歸原籍

上念效力舊臣命禮部引見諭曰爾等俱暮年歸家宜加意調

攝命賜茶各賚帛五表裏○己巳以徐乾學爲刑部尙書由左都御史遷

○庚午河道總督靳輔奏漕臣慕天顏等朋謀陷害阻撓河務

上諭大學士等凡事俱有是非應據理直言今觀有言人之過者



眾皆隨聲附和以爲不善並不據理辨其是非近因靳輔被參議  
論其過者甚多靳輔爲總河有年挑河築隄漕運並未遲誤謂之  
毫無效力亦屬不可但其屯田下河之事雖百喙亦難逃罪卽欲  
將靳輔置之重典亦須畱七八年俟繼用之人河工告成之日始  
可議罪靳輔將何往耶凡事有不可令其奏辨者亦有宜令其奏  
辨者語云人窮則呼天今若不令靳輔奏辨則定案矣靳輔不將  
情由陳辨朕前復何所控告耶且朕曾閱河防一覽於治河之事  
洞悉凡事皆慮永久不計目前此事著九卿一併察議以聞○以  
李之粹爲浙江布政使由貴州按察使遷董安國爲四川按察使由山東濟甯道遷  
○子故欽天監治理厯法加工部右侍郎南懷仁祭葬諡勤敏  
○辛未刑部侍郎薛柱斗以衰庸革職○壬申調傅拉塔爲刑部  
右侍郎由工部調○癸酉轉伊爾格圖爲工部左侍郎以齊穡爲工部

右侍郎

由內閣  
學士遷

三月甲戌朔工部左侍郎監修下河孫在豐奏前臣與佛倫等會  
勘河工時原議海口應行挑濬擬有奏稿後竟不以上聞雖係佛  
倫主稿實靳輔陰謀也其幕賓陳瑄贖貨無藉法所不宥得旨九  
卿詹事科道一併察議具奏○河道總督靳輔奏中河工竣運道  
新通請加高築遙隄以圖永保從之○乙亥以馬齊爲左都御史

由山西  
巡撫遷

○以鄭重爲刑部右侍郎

由左副都  
御史遷

○以兵部左侍郎丹

岱爲杭州副都統○丙子以曹熙衡爲貴州按察使

由四川建  
昌道遷

○

戊寅以朱都納爲內閣學士

由內閣侍  
讀學士遷

王承祖爲左副都御史

由太

常寺  
卿遷

○庚辰轉禪布爲兵部左侍郎以舜拜爲兵部右侍郎

由內  
閣學

士○調葉穆濟爲山西巡撫

由甘  
肅調

○辛巳

上御乾清門召大學

士學士九卿詹事科道及總督董訥總河靳輔巡撫于成龍原任

尚書佛倫熊一瀟原任給事中達奇納趙吉士等入奏河工事宜  
靳輔奏曰臣專管上河再四籌度惟有高家堰外再築重隄水不  
歸下河庶有裨於淮揚七州縣至開濬下河臣恐有海水倒注之  
患 上曰朕不忍淮揚百姓遭罹水患故令爾等公同詳議海水  
倒注無有是理郭琇奏曰靳輔於上河派民之事甚多卽如派車  
派驢在在騷動況屯田之事明係奪民產業江南田畝原有二畝  
算一畝者因地勢窪下坍長不常若計畝重課實爲累民 上曰  
屯田害民靳輔縱百口亦不能辯開海口乃必然應行之事爾等  
但論下河之當挑與否及重隄之築與不築耳靳輔奏曰高家堰  
修築重隄將水截住盡出清口不令水歸下河則七州縣被水之  
田可出故特題請卽今猶以修築重隄爲是于成龍奏曰修下河  
開海口之事奉特旨而行今高家堰修築重隄停開海口縱上流

之水不來而秋霖暴漲天長六合等處奔赴之水洩歸何處臣愚  
以爲海口仍應開濬 上諭九卿曰此事爾等將孰是孰非及河  
務作何區畫之處會同詳加議奏九卿出 上顧大學士等曰河  
道實屬難知朕畱心已久深悉情形九卿各懷私意畏懼靳輔不  
肯定議朕意且勿發若明示以朕意九卿等必將承望風旨而言  
矣此等大事須至公持議方有當於理耳○壬午 上御乾清門  
召大學士九卿等入奏河工事宜工部尙書李天馥奏曰臣等遵  
旨問靳輔于成龍皆堅執前說與昨日所奏無異臣等公同酌議  
下河當開重隄宜停止修築 上諭九卿曰靳輔舉行屯田之事  
因取民餘田小民實皆嗟怨此在靳輔當亦無可置辨靳輔奏曰  
向者河道大壞處處衝決民田盡被水淹臣任總河將決口堵閉  
兩旁築隄仰賴 皇上如天之福比年以來河流故道無有衝決

之患是以數年水淹之田盡皆涸出臣意將民間原納租稅之額田給與本主而以餘出之田作爲屯田抵補河工所用錢糧因屬吏奉行不善民怨是實此處臣無可辯惟候處分 上問靳輔曰海口淤塞起於何年靳輔奏曰據土人云從明代隆慶年淤塞至今每海潮來一次卽增一葉厚之沙故漸至壅塞 上曰爾云海潮每至卽增一葉厚之沙此言甚屬虛妄凡內河遇海潮來時水壅逆流及潮退則壅積之水其流甚疾卽微有停蓄之物亦順流刷去尙何有沙之存積耶大抵所開河道久歷年所兩岸隄工爲雨水傾塌則河底漸淤勢所必至卽如近水地畝或以傾塌成河河內或沙灘成地豈因海潮灌注而然據爾言開濬海口海水必將倒入將來海口一開便有明驗朕記爾今日之言畱爲後日之據又問于成龍曰減水壩可塞乎塞減水壩以開海口河隄可不

衝決乎于成龍奏曰不能保其不決臣於上河實未明曉焉敢妄對上又問于成龍曰爾曾言崔維雅治河之論可行果可行乎于成龍奏曰崔維雅之論可行但聞人言如此臣實未甚明曉上諭九卿曰朕於河務畱心甚久崔維雅治河書亦會細閱其勢必不能行卽彼所云自蕭家渡直開至清口日用夫七萬期於五旬告成朕思夫役安得如許之多卽夫役可得而飲食柴薪之類從何運濟凡立說貴乎持平要在當理于成龍謂崔維雅治河之說可行則於理難通朕未之信也又諭九卿曰屯田害民朕已洞悉各省民田未有不溢於納糧之額數若以餘田作屯田按畝定額豈不大擾民乎屯田不行無可復議至下河作何開濬重隄應否停築爾等公同詳酌確議具奏上顧大學士伊桑阿等曰于成龍亦未洞悉河務朕以伊爲直隸巡撫頗優故未深難耳總之有

治人無治法止在實心任事若徒以口舌爭亦何濟乎○甲申以

伊圖爲甘肅巡撫

由光祿寺卿遷

○乙酉九卿等遵旨會議下河海口宜

開高家堰重隄宜停築各減水壩俟海口開通之後酌議緊要者  
留之不緊要者塞之至靳輔等應行議處之事俟孫在豐慕天顏  
到京時問明再議 上曰不必等候董訥慕天顏孫在豐等身爲  
大臣凡有所見卽當奏明乃事前並未題參於他人參奏之後始  
行具陳且今日之言如此明日又復如彼全無定見可謂大臣乎  
今下河海口應行挑濬其各閘壩俟海口挑成或留或塞再行定  
奪○刑部等衙門議覆直隸巡撫于成龍原任山西巡撫馬齊原  
任左副都御史開音布奉差湖廣審湖北巡撫張汧借稱前任閩  
省藩庫虧空帑銀勒索屬員胡戴仁等出銀抵補又派收鹽商之  
銀共九萬餘兩入己上荆南道祖澤深勒索民人李二楊等銀共

入萬餘兩入己總督徐國相與張汧同城失察差往湖廣侍郎塞楞額審事不實請一併交部議處查侍郎塞楞額差審巡撫張汧徇情失實又回奏欺罔應論斬監候張汧祖澤深藐法受賄應論絞監候湖廣總督徐國相與張汧同城不行參奏明係徇庇應革職布政使胡戴仁按察使丁焯應降二級調用又查從前保舉張汧之人有大學士梁清標尙書熊一瀟保舉張汧爲布政使戶部侍郎王遵訓內閣學士盧琦大理寺丞任辰旦保舉張汧爲巡撫俱應革職 上曰塞楞額回奏時原有審事不實甘受誅戮之言張汧祖澤深皆係貪官著依議完結至保舉張汧之官俱議革職似無分別張汧事犯於巡撫任內其保舉爲巡撫者俱著革職其保舉爲布政使者著從寬免革職降三級畱任徐國相著革職胡戴仁等著降二級調用○諭吏部總河靳輔總漕慕天顏侍郎



孫在豐互相訐參靳輔幕天顏不便畱任孫在豐亦不便修河伊等員缺應速行更換差遣○丙戌以薩穆哈爲內閣學士

由郎中遷

己丑封貝勒昌阿岱孫星海爲鎮國公○調王新命爲河道總督

由福建浙江總督調

○命戶部左侍郎開音布督理下河○庚寅免康熙十

七年以前江南江西漕糧○以馬世濟爲漕運總督

由貴州巡撫遷

○戶

部議准原任戶部尙書佛倫奏河工屯田累民業蒙 皇上洞悉

永行停止請飭該督撫逐一清查有丈出民間之田悉令給還原

主其暫設屯田同知縣丞等官應行裁汰赴部候補從之○辛卯

裁湖廣總督○癸巳裁直隸眞定總兵官○甲午議政王大臣等

議准左都御史馬齊奏差往鄂羅斯大臣請不分滿漢一體差遣

上曰此所議甚是著九卿選舉應遣者奏聞○以彭孫適爲內

閣學士

由翰林院侍講學士遷

○乙未以徐誥武爲戶部右侍郎

由左副都御史遷

○丙申諭內閣今時略旱而欽天監奏四月朔日食凡應行應革

之事其令九卿詹事掌印不掌印科道官集議以聞○以王隲爲

福建浙江總督

由江西  
巡撫遷

○丁酉九卿等議覆河工一案將總河靳

輔擬革職其奉差閱河之尙書佛倫熊一瀟給事中達奇納趙吉

士督理下河之侍郎孫在豐會勘河工之總督董訥總漕慕天顏

俱擬革職幕賓陳璜革去職銜擬杖流 上諭大學士等凡爲臣

者懷挾私意互相陷害自古有之不但漢官蹈此習俗雖滿洲亦

然爾等宜竭誠秉公變此習俗以盡臣職此案著將靳輔革職佛

倫任工部時極其勤勞凡奉差遣亦能勝任但議此事舛錯殊甚

著畱其佐領以原品隨旗行走董訥孫在豐在翰林時頗優從寬

免革職降五級仍以翰林官用熊一瀟極其庸劣慕天顏居官不

善俱著革職趙吉士行止不端亦著革職達奇納著降五級隨旗

行走陳璜革去職銜解京監候○以線一信爲湖北按察使

由江西驛

鹽道

○己亥增差督捕理事官張鵬翻兵科給事中陳世安赴鄂

羅斯定邊界○庚子諭從前詣 兩宮請安皆於起居注記檔今

詣 甯壽宮請安朕因不忍過 慈甯宮故從啟祥門行走但此

係宮禁之地外官無由得知此後每次請安著令太監傳諭敦住

仍令起居注官記載其不忍由隆宗門行走之故亦令諭侍郎庫

勒納知之○壬寅賜沈廷文等一百四十六人進士及第出身有

差○以李廷松爲左副都御史

由宗人府府丞遷

○調田雯爲貴州巡撫

由江

○以胡獻徵爲湖北布政使

由直隸巡道遷

○停止河道總督坐名

題補河員○諭兵部尙書張玉書刑部尙書圖納左都御史馬齊

曰前李光地曾奏德格勒徐元夢所學甚博作文甚優漢官亦不

能及德格勒奏李光地用爲總督提督令同伊母赴任始肯就職

若用於別任必不來也朕因其互相陳奏欲辨虛實從前將德格勒親加考試其文見存今李光地已來京爾等可將德格勒試卷宣示九卿並以問李光地於是張玉書等傳集九卿公閱德格勒試卷奏稱德格勒之文詞語粗鄙毫無文氣詰問李光地亦自甘妄奏之罪請將李光地下部議處上曰李光地本應治罪念其任學士時凡議事不委順從人臺灣之役人皆謂不可取李光地獨言可取此其所長除此事外別無妄奏之處姑從寬免令仍爲學士○兵部奏湖廣總督業經裁缺所有督標官弁兵丁俱應裁去其見任副將遊擊守備等員應赴部另補其裁兵內有仍願爲兵者准於通省各營中查明革退老弱逃亡等項兵缺速行頂補有願爲民者交地方官安插從之

夏四月癸卯朔日有食之○甲辰九卿等覆奏總河靳輔開濬中

河果否可永通漕運應交新任總河再行查明詳議具奏 上曰

中河糧船今年可行則每年亦可行此自然之理也但靳輔已經

革職新河臣尙未到任見在河員或視河工與己無涉不盡心力

以致運艘阻滯亦未可定其令學士凱音布侍衛馬武等前往看

閱○轉徐廷璽爲工部左侍郎以王承祖爲工部右侍郎由左副都御史

選○丁未以宋犖爲江西巡撫由江蘇布政使還○戊申以傅拉塔爲江

南江西總督由刑部右侍郎遷○調胡獻徵爲江蘇布政使由湖北調○己酉

上啟鑿奉 大行太皇太后梓宮詣 山陵 上不勝哀慟親

隨扶送步行三里餘方乘騎每昇校更換時必下馬旁跪哭不停

聲遙見 享殿卽下馬步隨哭至 享殿奉安後仍哀慟不止○

癸丑以傅感丁爲左副都御史由通政使遷○以洪之傑爲江蘇巡撫

由左僉都御史遷○以佟國佐爲湖北布政使由浙江按察使遷○甲寅理藩院

奏據達賴喇嘛奏稱 皇上撫視人民中外一體聞厄魯特喀爾

喀兩國相殘卽遣人齋敕諭和今遵 聖諭遣卜克岡喇嘛去矣

仍祈 皇上睿鑒或再頒敕諭另遣人前往令其無致相殘 上

乃遣內閣學士拜禮喇嘛阿齊圖綽爾濟往諭噶爾丹○以阿喇

彌爲刑部右侍郎由內閣學士遷○丙辰以楊鳳起爲河南按察使由福建

道○丁巳 上謁 孝陵○戊午吏部尙書廖旦以老乞休允之

○己未以胡什巴爲內閣學士由內閣侍讀學士遷○庚申內閣學士凱音

布侍衛馬武等奉差看閱中河回京繪圖進呈召大學士學士九

卿詹事科道等入行宮諭曰前于成龍奏云靳輔開中河無所裨

益甚爲累民河道已爲靳輔大壞矣今凱音布等往勘中河奏云

中河內商賈船行不絕若塞支河之口則駱馬湖之水匯流中河

水勢旣大漕艘可通今數年以來河道未嘗衝決漕艘亦未至有

誤若謂靳輔治河全無裨益微獨靳輔不服朕亦不愜於心矣于成龍在直隸愛民緝盜居官頗優但懷挾私讐阻撓河務殊爲不合朕非欲起用靳輔止以河務所關甚大耳今九卿已將靳輔議罪皆言其治河無益若王新命聞之亦順從于成龍之說以靳輔所治不善大壞河道將原修之處盡行更改是伊等各懷私忿遂致貽誤河工可乎且黃河自宿遷以下衝決猶可修治若宿遷而上或致泛濫則爲害甚大前旨令馬齊往鄂羅斯今河工緊要停其前往著卽同張玉書圖納往閱河工務將毛城鋪高家堰等地方徧閱就靳輔所修之處其甚善而斷不可改者有幾不善而應更改者有幾詳悉商酌其漢軍漢人官員尙應添遣著開列具奏又凱音布等奏稱中河所行漕艘慕天顏勒令退回支河之口不許閉塞慕天顏如此阻撓深屬可惡爾等速回京將慕天顏提拏

夾訊問誰爲唆使則情實畢露此等之人不重加懲治不可也朕素不食言亦不爲異日無驗之語向者岳州洞庭進剿兵船眾議謂宜撤回朕獨以爲不可卒致成功靳輔以丈出民間餘地作爲屯田及阻抑開濬下河其罪誠不可追至有言黃河沙底漸高此斷不可信譬之盆內貯水遇風尙且溢出使黃河沙底果高一有風濤其有不漫溢橫流決隄潰岸者乎○辛酉奉安 大行太皇太后梓宮於享殿○壬戌以下永譽爲浙江按察使原任江蘇按察使○甲子 上詣 暫安奉殿內恭視 大行太皇太后梓宮封掩畢奠酒慟哭良久始出是日駐蹕薊州孫家莊西扈從王大臣等奏曰 太皇太后梓宮今已奉安喪禮告成自古人君居喪止二十七日 皇上極其純孝已閱四月矣請卽日遵例除髮得旨俟明日至薊州除髮○戊辰 上還京師○庚午增差兵部侍郎成其



範工部侍郎徐廷璽閱河

五月壬申朔 上幸瀛臺○尙書張玉書圖納左都御史馬齊侍郎成其範徐廷璽以奉差看河請訓 上曰爾等至彼處從公詳看是曰是非曰非據實具奏願張玉書曰凡是非可否爾當秉公陳奏不可如熊一瀟託疾推諉又諭圖納等曰朕聽政二十餘年閱歷世務已多甚慄慄危懼前者凡事視以爲易自逆賊變亂之後覺事多難處每遇事必慎密圖維詳細商榷而後定凡所行事起居注官無不記注歷年所奏河道變遷圖形朕俱畱內時時看閱朕素知河道最難料理從古治河之法朕自十四歲卽反復詳考人皆云河道壞於靳輔放水淹沒民田朕意不然靳輔果能收放河水則其人亦非平常必能成功何云河道自彼而壞卽宿遷高家堰等處運河朕所深知他處未經親到未能明晰書云無稽

之言勿聽弗詢之謀勿庸爾等皆國家大臣此係國家公務爾等宜殫心盡力若果有異常大水隄岸衝決亦非爾等所能保爾等但據見在從公詳閱可耳前佛倫往勘回奏殊多錯誤今已處分爾等前往會同總河王新命將毛城鋪高家堰諸處從公詳看三分之中得其一二便可遣人將情形大略先行陳奏至公同看畢之後再行具奏其毛城鋪減水壩無益爾等將海口亦行看閱下河自有專遣之人爾等但觀其大略不必繕入奏內○九卿等覆奏臣等遵旨勘問慕天顏阻撓河工之處據慕天顏供稱于成龍曾寄伊書言河工之事不應順靳輔而言故將靳輔另行參奏以此問于成龍亦云寄書是實至挑濬中河無益得之傳聞並無指實自甘妄奏之罪 上曰于成龍巡撫直隸居官甚優仍著赴任慕天顏居官不善素行乖戾仍著羈禁俟看河大臣回時定奪凡

會議政事必詳察合理不可怠忽輕易朕每遇事之大者卽與內閣大臣商酌而後定凡授大僚無不如此至吏部升補官員俱有一定之例或有不肖之徒賄求不已此皆習俗不良今當痛改前轍秉公而行朕聽政年久於人之善惡事之是非無有不知其事屬微眇每多寬恕若果詳究過愆當無人可免罪者且朕所理之事悉載記注日後必有可徵驗者當三逆變亂之時亦有徬徨畏懼者惟朕堅意主持大小事宜必詳審處斷始得平定今爾諸臣凡事應各抒己見一意秉公不可碌碌徇人且徇人何益孰優孰劣朕豈有不知者乎○癸酉諭領侍衛內大臣索額圖等羅剎侵我邊境交戰於黑龍松花呼馬爾諸江據我屬所居尼布潮雅克薩地方收納我逃人根特木爾等及我兵築城黑龍江兩次進剿雅克薩攻圍其城此從事羅剎之原委也其黑龍江之地最爲扼

要由黑龍江而下可至松花江由松花江而下可至嫩江南行可  
通庫爾瀚江及烏喇甯古塔席北科爾沁索倫打虎兒諸處若向  
黑龍江口可達於海又恆滾牛滿等江及淨溪里江口俱合流於  
黑龍江環江左右均係我屬鄂羅春奇勒爾畢喇爾等人民及赫  
哲飛牙喀所居之地若不盡取之邊民終不獲安朕以爲尼布潮  
雅克薩黑龍江上下及通此江之一河一溪皆我所屬之地不可  
少棄之於鄂羅斯我之逃人根特木爾等三佐領及續逃一二人  
悉應向彼索還如鄂羅斯遵諭而行卽歸彼逃人及我大兵所俘  
獲招撫者與之畫定疆界准其通使貿易否則爾等卽還不便更  
與彼議和矣是日索額圖等啟行尋以喀爾喀厄魯特交相爭戰  
報至 上遣侍衛夸塞關保往追索額圖等令其退駐汎界地方  
將遲滯緣由遣人曉諭鄂羅斯使臣於是索額圖等以前情作書

令前鋒參領索羅希等持送彼處鄂羅斯使臣答書稱已遣人由  
尼布潮赴京索羅希等以書奏覽 上乃召索額圖等還○乙亥

大學士等以禮部具題山西省烈婦荆氏等照例旌表一疏請旨

上曰夫死而殉日者數禁之矣今見京師及諸省殉死者尙眾  
人命至重大而死喪者惻然之事也夫修短壽夭當聽其自然何  
爲自殞其身耶不甯惟是輕生從死反常之事也若更從而旌異  
之則死亡者益眾矣其何益焉此後夫死而殉者當已其旌表王  
以下至於細民婦人從死之事當永永嚴禁之若有必欲從死者  
告於部及該管官具以聞以俟裁定議政王貝勒大臣九卿詹事  
科道官會同確議奏馬○己卯吏部尙書陳廷敬刑部尙書徐乾  
學各以疾乞休命原官解任○壬午調阿蘭泰爲吏部尙書由兵部調  
張士甄爲吏部尙書由禮部調李天馥爲刑部尙書由工部調○丁亥以紀

爾他布爲兵部尙書

由都統遷

○甲午

上謁

陵啟鑾

○丙申

上

謁

暫安奉殿

孝陵至

仁孝皇后

孝昭皇后陵奠酒

○丁

酉

上復謁

暫安奉殿回鑾

○庚子

上還京師

六月壬寅朔以噶爾圖爲四川巡撫

由左副都御史遷

○甲辰荊州將軍

噶爾漢安徽巡撫楊素蘊等各奏報楚省裁兵夏包子等鼓譟搶

劫聚眾作亂巡撫柯永昇投井身故賊黨竊據武昌城

上命都

統瓦岱爲鎮武將軍率兵往討之○丁未以噶世圖爲左副都御

史

由通政使遷

○調丁思孔爲湖廣巡撫以閩興邦爲河南巡撫

由順天府

遷

○辛亥頒敕諭於都統瓦岱○諭吏部刑部所奏之事皆關

繫人命甚爲緊要嗣後刑部滿員外缺出爾部除擬正陪引見外

將伊木旗見任員外盡令引見朕自行選用○諭大學士等近來

科道官無條奏者建言乃科道專職止在不存私心耳可傳諭科

道官有條陳事赴暢春園面奏○庚申尚書阿喇尼奏噶爾丹率兵掠厄爾德尼招居民直抵喀喇卓爾渾之地距澤卜尊丹巴所居僅一日程澤卜尊丹巴攜土謝圖汗妻與子媳及喇嘛班第等夜遁喀爾喀通國各棄其廬帳器物馬駝牛羊紛紛南竄晝夜不絕土謝圖汗不知存亡諭喀爾喀與厄魯特互相攻戰我邊塞地方宜加防守翁牛特巴林克西克騰四子部落等旗共派兵二千五百名暫駐蘇尼特一帶汛地防守○丁卯轉翁叔元爲吏部左侍郎調張集爲戶部右侍郎由倉場調○戊辰以熊賜履爲禮部尚書原任大學士翁叔元爲工部尚書由吏部左侍郎遷徐元文爲左都御史原任學士○庚午吏部奏本月二十四日臣等遵奉諭旨湖廣藩臬官關繫緊要其布政使缺令御史于養志補授按察使缺令御史李鈞補授並令馳驛速往查見任湖廣布政使佟國佐按察使線一信應

請撤回赴部另補從之○是月免江西宜春等三縣去年旱災賦



東華錄

康熙四十二

臣 王先謙敬編

臣 周澗 周澗 蕃恭校

秋七月壬申澤卜尊丹巴胡土克圖遣使告急奏曰去年噶爾丹率兵三萬餘分道而來誘我扎薩克圖汗等叛去我土謝圖汗領兵追而執之以歸後噶爾丹之弟多爾濟扎卜等領兵來掠右翼班第戴青台吉卜圖克森巴爾丹等人畜而去土謝圖汗追殺多爾濟扎卜收回人口噶爾丹又領兵三路而來土謝圖汗及西海羅卜臧滾布領兵前至噶爾丹所駐之地遇達賴喇嘛使者所遣人宣示 皇上諭和之旨遂退駐楚克獨斯諾爾地方今噶爾丹自杭愛山後掠取左右翼台吉等至忒木爾地方土謝圖汗之子噶爾旦台吉與戰大敗僅以身免又聞丹津溫卜等率兵來取厄

爾德尼招之地其地距我地僅二日程仰祈速賜救援又理藩院奏設站侍郎文達報稱喀爾喀人眾屯聚於蘇尼特汛界之地內有台吉數人率其屬裔來投守邊將弁禁之彼言我地被兵不得已始進邊汛 皇上聞之亦必憐憫逐之不去澤卜尊丹巴亦率眾來至近邊駐紮距設站之地僅半日程 上諭領侍衛內大臣舅舅佟國維等見今窘迫來奔之喀爾喀等應否令其出我邊汛或將彼汛哨稍展就伊等所居之地另爲設哨防守此事關繫重大其令議政王大臣詳議尋議喀爾喀人等窘迫來奔不便卽令出邊若久留之又恐收地殘毀姑俟一月以內探得實音將來奔之喀爾喀作何措置再行確議從之○湖廣提督徐治都奏六月十四日官兵於應城縣地方遇夏包子賊眾二千餘人我師奮力攻擊陣斬偽副將二守備三把總一殺獲甚眾隨駐師應城縣內

嗣於十八日等日賊首夏包子率賊兵萬餘圍攻應城我師內外

夾擊大敗之賊奔德安請敕調南陽總兵出師安陸以資防守得

旨嘉獎下部議敘○癸酉以石文桂爲倉場侍郎

由內閣學士遷

○甲戌

侍讀海三代往澤卜尊丹巴處途遇厄魯特因攜噶爾丹奏疏歸

疏曰澤卜尊丹巴士謝圖汗違違賴喇嘛之教不尊禮西勒圖告

之以禮法歸好爲是而彼反以爲非竟興兵而來我於此仗達賴

喇嘛之靈來毀其居彼兩人者不爲取所許殆無所往卽往亦不

納也噶爾丹又屬海三代轉奏澤卜尊丹巴來投 天朝或拒而

不納或擒以付之奏入 上命議政王大臣等集議尋議我 皇

上俯視天下萬國爲一體其職貢之國凡有困迫來投者無不受

而養之澤卜尊丹巴以敗奔入我汛界豈有擒而畀之之理此等

情節應撰敕遣使往諭 上遣一等侍衛阿南達喇嘛商南多爾

濟戶部郎中西拉工部員外郎穆朱瑚齋敕往諭敕曰朕統御萬  
內胞與爲懷願率土共享太平無戰爭離散之苦彼此協和各得  
其所前聞爾厄魯特與喀爾喀交惡興兵朕思爾等向皆和好恐  
致滅亡以達賴喇嘛愛育眾生令同遣使諭和達賴喇嘛欣然遣  
齊緝克他賴堪布朕亦遣阿齊圖綽爾濟學士拜里前往諭和又  
前此遣爾貢使陶賴哈什哈等齋敕馳驛前去未知到否亦曾以  
此敕諭喀爾喀土謝圖汗矣今海三代歸奏始知汝至喀爾喀之  
地海三代非朕所遣乃奉差於鄂羅斯議好定界尙書阿喇尼所  
遣其言不甚明悉且與爾未經面見爾厄魯特喀爾喀俱遵行達  
賴喇嘛道法達賴喇嘛向來利濟眾生欲使同歸和睦不至敗亡  
是以皆遣人往諭道路遙遠汝等交惡之故所聞未明茲特遣使  
齋敕詰問情由其仍遵朕旨與達賴喇嘛之教議和或別有行止

亦明悉具本交此使來奏○轉張集爲吏部左侍郎以王封滌爲

吏部右侍郎

由內閣學士遷

○禮部議覆御史梅鋞奏

大行太皇太后

違豫以來

皇上步禱

郊壇親調藥餌身不解帶目不交睫者

歷數十日於居喪時則饋粥不入席地露寢屏去服御者又數十

日迨

梓宮啟行

皇上徒步悲號朝夕

行殿哭奠如初種種

孝思臣愚不能述其萬一竊念會典一書乃聖子神孫所法守四

海臣民所仰遵聞會典見在纂輯請敕編纂之臣取史官記注與

諸臣章奏詳慎登載以光至治應如所請詳查起居日記及王大

臣等本章凡關繫

皇上孝思懿行應載會典者編入會典應載

政治典訓者編入典訓至恭上

大行太皇太后尊諡及升祔

太廟

奉先殿典禮亦應一併載入則大禮始終俱備昭垂萬世

無窮矣得旨依議○丙子裁眞定鎮標遊擊一守備二把總一兵

九百十二名暫行分撥各營遇老弱逃亡事故停其頂補○丁丑  
巴林王納木達克台吉吉阿拉卜坦等奏喀爾喀兵敗於厄魯特  
土謝圖汗澤卜尊丹巴遁走其屬下台吉等入內奔竄來投者甚  
多 上命領侍衛內大臣津進郎中帕海侍讀學士馬拉速赴烏  
朱穆秦巴林科爾沁各駐汛界之地偵探情形又命侍衛關保傳  
諭侍郎文達令其往會阿霸哈納班第戴青車陵戴青公同派發  
兩戴青之兵於澤卜尊丹巴所居之地設哨防護其諭噶爾丹敕  
及海三代攜來噶爾丹奏疏俱令與澤卜尊丹巴視之巴林王所  
奏令與我邊汛駐紮大臣等視之○戊寅禮部奏四川巡撫姚締  
虞病故照例應給半葬致祭得旨姚締虞居官素優著給全葬○  
己卯以江有良董訥俱爲內閣學士

江有良由內閣侍讀學士董  
訥由翰林院侍讀學士遷

○壬午兵部議覆侍郎多奇傳拉塔奏臣等奉差審雲南提督萬

正色虛冒兵餉貪賄賂是實應按律論死總兵官王珍誣擊皮破  
玉等以良爲盜例應發邊衛充軍因熱審減等革職杖徒准收贖  
應如所奏得旨萬正色前陷賊時抗志不屈行間血戰勞績甚多  
從寬免死著革去提督留伊所得拜他喇布勒哈番王珍著革職  
○福建提督靖海侯施琅陛見 上諭曰爾前爲內大臣十有三  
年當時因爾閩人尙有輕爾者惟朕深知爾待爾甚厚其後三逆  
反叛虐我赤子旋經次第平定惟有海寇游魂潛踞臺灣尙爲閩  
害欲除此寇非爾不可爰斷自朕衷特加擢用爾果能竭力盡心  
不負任使舉六十年難靖之寇殄滅無餘誠爾之功也邇來或有  
言爾恃功驕傲者朕亦頗聞之今爾來京又有言當留爾勿遣者  
朕思寇亂之際尙用爾勿疑況天下已平反疑爾勿遣耶今命爾  
復任自此宜益加敬慎以保功名從來功高者往往不克保全始

終皆由未能敬慎之故爾其勉之更須和輯兵民使地方安靜以副朕愛兵恤民並保全功臣至意施琅奏曰臣年力已衰封疆重大恐精神不堪 上曰爲將尙智不尙力朕用爾以智耳豈在手足之力乎○丙戌 上巡幸塞外啟鑿○添設看守 孝陵于總二把總四兵四百名○復設陝省黃龍山捕盜同如○壬辰 上駐蹕喀爾必哈哈達是峯舊名納哈里狀如浮圖高百餘丈 上率文武諸臣以次仰射 上連發數矢皆過峯頂侍衛桑革納拉善二人射至其巔餘不能至 上更其名爲喀爾必哈哈達○癸巳南陽總兵官史孔華奏七月初十日臣率師自雲夢進討夏逆賊據漢陽府城我師破門直入賊遁走武昌十八日恢復漢陽得旨嘉獎下部議敘○湖廣提督徐治都奏七月十五日逆賊夏包子親率賊眾駕舟至鯉魚澗近岸駐紮臣隨遣參將鄭興等奮力



勦殺槍礮並發賊船盡遭焚毀餘賊來犯大營者官兵擊走之陣  
斬及溺水死者四千餘人生擒僞總兵一僞副將參將都司千總  
把總二十餘僞兵三百餘人夏逆僅以身免得旨嘉獎下部議敘  
又奏七月十八日武昌城內僞總兵胡耀乾及僞文武官弁獻城  
投降齎獻僞軍師妖僧太原首級大元帥僞印一顆總督巡撫參  
將關防三顆稱夏逆後帶餘賊數百逃回武昌在城僞官弁等閉  
門不納夏賊復逃其妻子家口已收繫城內臣於十九日入武昌  
安撫軍民二十二日振武將軍瓦岱移文內稱我師至武昌縣賊  
聞風遁追勦至黃州僞總兵趙得等於二十日獻城投降黃岡縣  
生員宜畏生等擒獻夏逆磔斬軍前得旨嘉獎下部議敘

八月辛丑朔盛京戶部侍郎莽色以老乞休允之○癸卯 上駐

蹕巴顏溝行圍○丙午以趙山爲盛京戶部侍郎

由內閣  
學士遷○丁未

湖廣糧儲道葉映樞遺奏言康熙二十七年五月初九日臣署理湖北布政使忽於二十二日督標裁兵夏包子倡亂閉城造反劫奪撫臣敕印分兵圍臣衙署百計脅從臣幼讀詩書粗知節義雖白刃當前豈肯喪恥苟生臣此時微服匿影或可倖免以圖後效伏念臣守土之官也城存與存城亡與亡義所當然臣於二十一日朝服向闕九叩謝恩畢隨升衙門公座罵賊自刎勉盡一死以報國恩 上覽畢集諸王大臣等諭曰凡地方官城存與存城亡與亡者乃人臣之分近者武昌兵亂葉映樞守義不屈罵賊自刎朕閱其遺奏五內傷悼王大臣等其共聽之因令展讀奏疏聞者莫不感泣隨諭吏禮二部曰葉映樞值裁兵鼓譟抗志不屈捐生殉難忠節可嘉今覽遺奏情詞慘烈朕心深爲惻然不忍披閱應從優賜卹以表忠貞○己酉以吳延貴爲江西按察使

由樞道遷

○癸

丑賑蒿齊忒部眾○以多宏安爲江西布政使由安徽按察使遷○乙卯

以邁塗爲內閣學士

由光祿寺卿遷

○兵部尙書張玉書等奏臣等勘閱

黃河水勢兩岸出水頗高河身漸次刷深數年來雖遇大水未經出岸河身淤墊之說甚屬虛妄其海口兩岸二三里黃水汎溜入海並無阻滯至黃河南岸減水各閘壩見在雖不過水但從前俱酌量形勢建立以防異漲俱無庸更易北岸朱家堂等減水壩前河臣靳輔因修中河有拆毀者亦有閉塞者應無庸議其王家營西減水壩向未過水且在仲家閘下流相應仍留朱家堂等壩旣經閉塞應將北岸之大谷山減水閘壩並鎮口閘照舊仍留其減水閘壩之引河旣無常流之水必致淤塞除已經挑成引河者不議外應將未挑引河者停止挑濬至白洋河之便民閘地勢視歸仁隄較高八九尺見在之水俱可由歸仁隄五堡減水壩宣洩則

便民開引河亦應停止挑濬其高堰等處有減水壩六座內因五家墩高良澗等壩所減之水太甚今移設於茆家園等高阜之處則流入高郵寶應等湖之水較前差少應將所移之壩仍留清口流入運河之水一由太平閘一由七里閘兩道分行水勢平緩甚便漕輓又使運口去黃稍遠亦無倒灌之虞此修建之處甚善無庸更改至洪澤湖所洩之水由高郵寶應等處所有減水閘壩照舊仍留其微山湖荆山口入裏運河之水山貓兒窩馬莊集萬家莊等三座減水壩宜洩入駱馬湖仍應存留至於中河寬八九丈至三十餘丈不等深五六尺至一丈四五尺不等若使中河安流以濟舟楫免黃河一百八十里之險事屬甚便但中河偏近黃河不便挑寬而裏運河及駱馬湖之水俱入此河河窄難以容納勘閱蕭家渡楊家莊新莊口三處有黃河衝決入海舊河形應交與

河臣量建減水壩三座水小之時勿致漫流水大之時卽行減洩其河形稍有淺窄之處亦另行酌量挑濬至駱馬湖進黃河之口應照靳輔原議建減壩二座今年水勢甚大俟水落時令河臣驗明建造支河口亦應照靳輔原議閉塞於鄰近處建板閘一座令隨時啟閉仲家閘出黃河之口太直如遇黃水泛漲必致倒灌應稍向東南斜挑於口西下埽以避黃流庶免黃河倒灌至中河旣經挑濬其宿遷縣北攔馬河減洩黃水壩三座不便令更入中河應將此三壩閉塞又駱馬湖減水壩三座內二座所減之水雖注入中河但令中河建立閘壩減水相應將此二壩仍留其一座在遙隄外從舊河形入海而出水之口偏近遙隄亦應交與河臣幫修隄根保護遙隄毋致他虞至於運河內永安隄兩面受水勢甚危險又歸仁隄五堡減水壩被水衝壞並黃運兩河被刷坍塌之

處俱一併交與河臣修理堅固得旨九卿詹事科道會議具奏○辛酉盛京禮部侍郎席蘭泰以老疾乞休允之○癸亥喀爾喀洪俄爾戴青台吉等率其屬來朝上諭爾等喀爾喀與厄魯特世世進貢朕心寵眷從無偏庇一體優待恩賚有加今聞喀爾喀厄魯特互相結怨亟遣使臣令其和睦使臣未至而喀爾喀敗遁悉至哨探地方居牧朕一體加恩今亂尚未定故留之未遣爾母達賴達熙納聞朕大兵往尼布潮地方豫備餼糧牛羊以待朕甚嘉之爾先眾人報厄魯特橫肆情形又先眾人請安進貢尤爲可嘉諭畢上取所帶珊瑚數珠賜之以示優眷○丁卯設站侍郎文達侍衛阿南達奏土謝圖汗與噶爾丹於八月初三四等日相遇於鄂羅會諾爾之地鏖戰三日厄魯特兵夜襲善巴額爾克戴青之營破之喀爾喀屬下諸台吉星散土謝圖汗力弱乃越瀚海奔

至澤卜尊丹巴所 上以喀爾喀厄魯特交惡作亂境上急宜防

守派兵往駐張家口歸化城等處以聽調遣○以朱善爲盛京禮

部侍郎

由通政使遷

高夢說爲安徽按察使

由陝西潼商道遷

九月壬申諭兵部前者侍郎文達奏噶爾丹分兵三路追土謝圖汗將近我汛界朕以邊疆事關重大故頒諭旨派京師大兵以備之今聞噶爾丹於我朝所遣使臣待之有加禮殊爲恭順且又聞其遣使與我阿齊圖拜禮等偕來請安應將京城大兵暫且停其起程仍令各自豫備候旨大同宣府總兵官之兵亦暫停起行令其候旨行在所有之兵每佐領派護軍二名前鋒派二百名火器營兵全派令赴安親王軍前其存留官兵揀選肥壯馬匹給發前去之兵將青城運來之米計口投之此去之兵署都統諾敏彭春設軍統領托倫惠惠蘭副都統康哈拉尙圖酌量派章京統率前

往○丁丑先是巴林烏朱穆秦蒿齊忒克西克騰科爾沁阿霸哈納蘇尼特阿霸垓扎魯特歸化城土默特之各旗蒙古王台吉等節次奏報喀爾喀戴青台吉等共二十八人各率所屬人眾入邊請降奉旨令來降之喀爾喀准於汎界以內遊牧至是土謝圖汗與其弟西地西里巴圖爾台吉率左右兩翼台吉等又澤卜尊丹巴胡土克圖亦率其弟子等偕入汎界乞降沿邊一帶阿霸哈納諸台吉皆願從之內附理藩院以聞下議政王大臣集議尋議喀爾喀國破土謝圖汗澤卜尊丹巴胡土克圖等誠心請降應受而養之俾其得所卽令尙書阿喇尼前往汎界面見澤卜尊丹巴胡土克圖土謝圖汗等備宣諭旨從之○己卯雲南鶴慶劍川等屬地震 上命速發銀米賑濟○甲申噶爾丹遣使進貢請安並乞照常貿易下議政王大臣集議尋議噶爾丹訴其始終誠心敬



上之意又虔恭貢獻請准其貿易遣使往諭但目今喀爾喀俱奔入我汎界 皇上已令尙書阿喇尼往議安插俾令得所應俟阿喇尼前往汎界查明後作何遣使齎敕往諭噶爾丹之處另行奏請從之○丁亥吏部議覆偏沅巡撫興永朝奏楚省舊設驛道一員駐紮武昌管理全省驛務但湖南湖北道里遼遠以湖北之道遙制湖南事多貽誤請改湖南驛站事務歸湖南糧道兼理從之○廣東布政使柴望以年老廢事革職○辛卯 上還京師○壬辰吏部題殉難原任湖廣糧儲道葉映榴請加贈通政使廕一子入監讀書得旨葉映榴應予旌表著贈工部右侍郎餘依議○癸巳吏部尙書阿蘭泰兵部尙書紀爾他布工部尙書蘇赫奏湖廣地方遼闊統制兵馬應復設總督於地方有益報可○命臺灣文職員缺准該撫於閩省見任官內揀選調補○丙申以于三賢爲

雲南布政使

由御史遷

○丁酉工部尚書蘇赫奏臣等遵旨會議往看

河工大臣因中河狹隘恐水大不能容蓄欲於中河立三閘以減洩又問靳輔據云於二三十里之間應修小閘及涵洞臣等請

皇上親臨河上指示修築不但於漕運生民有裨益亦可折服眾論 上曰看河諸臣欲修三閘靳輔欲於二三十里之間修小閘

及涵洞所言雖異其意皆同俟臨閱河工時定奪○以張建績爲

廣東布政使

由御史遷

○戊戌以丁思孔爲湖廣總督

由湖廣巡撫遷

○吏部

議陝西巡撫布雅努於承審參革陝西按察使索爾遜案內伊家人李二等向索爾遜詐銀布雅努失於覺察又承審此案並未令兩司會審而具題奏內謊稱會審應照溺職例革職刑部等衙門遵旨會勘索爾遜於承審參革知縣王延齡等案得枉法贓銀共一百六十兩應按律論絞俱從之

冬十月辛丑刑部等衙門會議原任漕運總督慕天顏沮撓河工應杖一百徒三年不准折贖直隸巡撫于成龍陳奏失實應削去宮保銜降三級調用得旨于成龍從寬免降調慕天顏從前造船有效力之處亦從寬免罪○壬寅九卿等議覆兵部尚書張玉書等奏公閱河工請將原任河道總督靳輔修築之閘壩引河隄埝及建造挑濬工程有應留應止閉塞增添之處又黃運兩河有受衝被刷應修築者一併交與河臣修理堅固得旨攔馬河洩黃水之壩應否閉塞著河道總督詳看議奏○癸卯調楊素蘊爲湖廣巡撫由安徽調○以薩弼圖爲陝西巡撫由山西按察使遷○甲辰盛京刑部侍郎阿禮瑚坐誣良爲盜革職○乙巳尙書阿喇尼等奏臣等於九月二十九日至喀爾喀問土謝圖汗澤卜尊丹巴曰汝等入汎界而居之意何也今又將何往告曰我等爲厄魯特所敗奔進汎

界永歸 聖主乞救餘生作何安靜一惟 上裁又曰我等敗遁

盡棄部落牲畜而來雖少有所攜難以自存伏祈 皇上俯賜宏

恩臣等遂令土謝圖汗澤卜尊丹巴等將彼從降台吉等名字及

喇嘛班第部落人口數目查送計開見在偕來台吉三十餘人喇

嘛班第六百餘人戶二千人人口二萬在後未到者尙多俟到時另

行開送 上命議政王貝勒大臣集議尋議宜准土謝圖汗澤卜

尊丹巴之降命尙書阿喇尼侍郎文達查明見在不能度日人等

將副都統阿毓璽所運歸化城米糧均散賑濟土謝圖汗等宜給

以名爵但各路請降喀爾喀首領甚多應俟到日再議從之○丙

午賜王應統等九十四人武進士及第出身有差○戊申以吳什

巴爲盛京刑部侍郎由內閣學士遷○以江有良爲安徽巡撫由內閣學士遷能

特爲山西按察使由郎中遷○裁涿鹿永平眞定河間保定等衛守備

千總○辛亥 上謁 陵啟鑾○裁廣西陀陵土知縣歸永康州

轄○癸丑 上謁 暫安奉殿 孝陵至 仁孝皇后 孝昭皇

后陵奠酒○乙卯恭上 大行太皇太后尊諡曰 孝莊仁宣誠

憲恭懿翊天啟聖文皇后 上回鑾○丁巳 上還京師○己未

以郭世隆爲內閣學士由御史遷○兵部侍郎成其範緣事降調○庚

申兵部奏杭州防守尉陳廷章將承襲管佐領之子攜之任所應

罰俸一年 上曰陳廷章免罰俸此等承襲官及管佐領之員年

幼未滿歲者若不隨父之任無人教育勢必流爲匪人且生計困

乏矣向來上朝俱有一定年歲嗣後未滿歲之幼子皆許其隨父

任所滿歲後送入京師著爲令○以索諾和爲內閣學士由大理寺卿遷

○辛酉 孝莊文皇后升祔 太廟○壬戌頒詔加恩中外○甲

子以董訥爲兵部右侍郎由內閣學士遷○賑江南邳州等五州縣水災

十一月庚午朔

上幸南苑行圍

○癸酉以郭琇爲內閣學士

由太

常寺卿遷

○丙子工部議覆尙書蘇赫等奏臣等遵奉諭旨帶領原任

河道總督靳輔往閱沙河南北兩河水勢據靳輔奏稱沙河城東呂閣莊土溝莊葛渠莊及通州兩河進流之處建立蓄水閘可蓄水四百萬方其通州以下東岳廟等處水勢散漫南營等處因河中淤高水分兩道應於散漫分流之所築建小隄將水攔束其所蓄之水放洩時可增兩捺以濟漕運應如所請從之○丁丑上幸晾鷹臺大閱○戊寅以王維珍爲左副都御史

由太僕寺卿遷

○己卯

以原任尙書胡昇猷爲太常寺卿○甲申侍衛阿南達喇嘛商南

多爾濟等奏噶爾丹謂七旗喀爾喀非吾讎也但土謝圖汗澤卜

尊丹巴殺扎薩克圖汗及得克得黑墨爾根阿海盡俘其國又侵

掠我境殺我弟多爾濟扎卜棄好構難誠無地可容之人也臣等

令商南多爾濟滾楚克達爾漢囊素轉說之噶爾丹曰汝等諭我以禮法我甚悅我並無自外於 中華皇帝達賴喇嘛禮法之意又噶爾丹以貿易事遣滾楚克達爾漢囊素來告曰厄魯特從來進貢貿易各自分行今概不得往來我國之人殊爲憂苦今請照常行走候旨定奪奏入下議政王大臣議尋議 皇上軫念兩國原無異視今土謝圖汗等背棄盟誓殺扎薩克圖汗及得克得黑墨爾根阿海又先犯厄魯特殺噶爾丹之弟多爾濟扎卜實係伊等之過應遣人敕達賴喇嘛命遣一有名大喇嘛同本朝所遣大臣前往召集噶爾丹土謝圖汗等令土謝圖汗等自陳其過大集會閱永議和好於未遣使之前以此等情節先曉諭土謝圖汗如皆允服願行則約期於來年會閱如別有推辭俟到日再議噶爾丹奏請貿易之事應俟遣使大臣時再議從之○丙戌 上還宮

○刑部題審擬各案有律者引律無律者引例此舊制也今督撫及承審各官多有律例兩引候部臣定奪者或有失輕失重之處可以規避處分且恐受人屬託借此作弊請嗣後將律例兩引者概行停止從之○戊子兵部議准湖廣總督丁思孔奏武昌兵變地方官員有逃避及投偽職者請查明分別具題盡行拏問得旨投偽職官員著革職拏問餘從寬免○辛卯轉舜拜爲兵部左侍郎以沙穆哈爲兵部右侍郎由內閣學士遷○兵部議原任荊州將軍噶爾漢副都統郝佛於武昌兵變時率師進剿不能卽行撲滅藉稱戰船未備糧餉不給自行退回應將噶爾漢革職鞭責籍沒郝佛革職鞭責上曰噶爾漢著革職鞭一百不准折贖免其籍沒郝佛著革職免其鞭責○己亥倉場侍郎石文桂丁父憂命離任守制○是月免貴州黃平州江南亳州興化等四州縣水災湖廣崇



陽等七州縣旱災額賦有差

十二月庚子朔以星安爲內閣學士

由內閣侍讀學士遷

○兵部奏禮部尙

書熊賜履奉差浙江審事適丁母憂應回籍守制請另遣部院大

臣一員前往得旨著兵部尙書張玉書前往審理○癸卯以李廷

松爲倉場侍郎

由左副都御史遷

○乙巳

上謁

陵啟鑿○以線一信

爲湖南按察使

原任湖北按察使

○兵部奏武進士推選守備舊例分別

名次在前半者候選營缺在後半者候選衛缺查營缺多而衛缺

少甚有偏枯請嗣後不拘營缺衛缺將武進士挨次補用以免壅

滯從之○戊申

上謁

暫安奉殿○己酉

上謁

孝陵至

仁孝皇后 孝昭皇后陵奠酒○調張玉書爲禮部尙書李天馥

爲兵部尙書以徐元文爲刑部尙書

由左都御史遷

○以衛執蒲爲左副

都御史

由通政使遷

○壬子

上駐蹕蘭河崖行圍○戶部尙書王日

藻乞假歸葬允之○癸丑 上駐蹕米峪口行圍○乙卯調于養

志爲江蘇布政使由湖○丙辰 上駐蹕龍井關行圍○戊午調

徐元文爲戶部尙書由刑○庚申以沈志禮爲湖北布政使由廣

察使悉○刑部議覆御史趙廷珪奏律載子報父仇不告官而擅殺

行兇之人者杖六十蓋爲未經審抵冤抑無伸者言之也如仇家

已經審擬或遇赦宥復有藉口報仇擅行殺害者不得概引輕條

治罪應如所請嗣後子復父仇於告官審抵之後仇家幸遇赦免

復藉口復仇者流三千里卽著爲令從之○辛酉 上還謁 暫

安奉殿○壬戌 上詣 暫安奉殿行期年致祭禮○甲子 上

復謁 暫安奉殿回鑾○丙寅 上還京師○是月免江西宜春

等十二州縣及雲南開化府旱災賦○是歲朝鮮琉球入貢○人

丁戶口二千三十四萬九千三百四十一田地山蕩畦地百九十

萬四千一百八十四頃八十四畝有奇徵銀二千七百二十六萬  
二千三百七十五兩有奇米豆麥六百九十一萬六百五十三石  
有奇草二百二十五萬二千八百四十一束茶十五萬九千三百  
一十五引行鹽四百三十五萬六千一百五十引徵課銀二百七  
十六萬一千三百八兩有奇鑄錢二萬八千九百八十六萬九千  
八十有奇